



Memoria xustificativa dun convenio de colaboración entre a Vicepresidencia e Consellería de Presidencia, Administracións Públicas e Xustiza e o Concello de Xunqueira de Espadanedo para a execución do proxecto denominado Reparación dos danos provocados polas riadas de xullo de 2018

1. Departamento que tramita o convenio

A Vicepresidencia e Consellería de Presidencia, Administracións Públicas e Xustiza é o órgano da Administración autonómica que en virtude do Decreto 74/2018, do 5 de xullo, polo que se establece a súa estrutura orgánica ten atribuídas a elaboración, proposta e execución da política do Goberno Galego en materia de administración local e as competencias en materia de asistencia á Administración Local, así como o fomento das liñas de colaboración coas entidades locais.

Dentro deste departamento, as competencias en materia de Administración local están atribuídas á Dirección Xeral de Administración Local. A este centro directivo correspóndelle, en particular, o fomento das liñas de colaboración coas entidades locais galegas no referente á convocatoria e execución das subvencións a elas destinadas.

2. Antecedentes

A Xunta de Galicia, a través da Vicepresidencia e Consellería de Presidencia, Administracións Públicas e Xustiza, ten previsto asinar co Concello de Xunqueira de Espadanedo un convenio para a execución do proxecto denominado Reparación dos danos provocados polas riadas de xullo de 2018.

O Decreto 74/2018, do 5 de xullo, polo que se establece a estrutura orgánica da Vicepresidencia e Consellería de Presidencia, Administracións Públicas e Xustiza, configura esta como o departamento da Xunta de Galicia ao cal lle corresponde a elaboración, proposta e execución da política do goberno en materia de administración local, atribuíndolle, entre outras as competencias en materia de asistencia á Administración local.

Á súa vez, o artigo 22 do antedito decreto determina que a Dirección Xeral de Administración Local é o órgano encargado da xestión das competencias atribuídas á Xunta de Galicia en materia de Administración local e a este centro directivo correspóndelle, en particular, o fomento das liñas de colaboración coas entidades locais galegas no referente á convocatoria e execución das subvencións a elas destinadas.

Segundo dispoñen os artigos 25 e 26.1 da Lei 7/1985, do 2 de abril, reguladora das bases do réxime local e os artigos 80 e 81 da Lei 5/1997, do 22 de xullo, de Administración Local de Galicia, os concellos deberán prestar á súa cidadanía os servizos públicos que contribúan a satisfacer as necesidades e aspiracións da comunidade de veciños.

Por outra banda, o artigo 25 da Lei 8/2009, do 22 de decembro, pola que se regula o aproveitamento eólico en Galicia e se crean o canon eólico e o Fondo de Compensación Ambiental, establece que as actuacións ás que se destinará a parte do fondo que non estiver destinada ás entidades cuxo termo municipal se atope dentro da poligonal de delimitación dun parque eólico ou resulten afectadas polas correspondentes instalacións de conexión, terán que estar dirixidas á protección do ambiente, incluídas aquelas que teñan por obxecto a prevención, extinción e xestión de situacións de sinistro ou risco.

A Comunidade Autónoma de Galicia ten como obxectivo o desenvolvemento equilibrado do territorio galego, do medio rural e do urbano, do interior e da faixa costeira, que permita o desenvolvemento económico da totalidade do territorio e que a cidadanía galega teña unhas óptimas condicións de vida, con independencia do seu lugar de residencia, potenciando e apoiando a prestación de servizos por parte dos nosos concellos que son a Administración máis próxima aos administrados.





O obxectivo común é conseguir ou recuperar o funcionamento das infraestruturas municipais, de forma que os concellos poidan prestar servizos de calidade á veciñanza con independencia do seu lugar de residencia.

Por outra banda, na aplicación orzamentaria 05.23.141A.461.0 (CP 2015 00167 *Actuacións globais destinadas á conservación, reposición e restauración do medio ambiente*) existe crédito que se considera axeitado e suficiente para a súa aplicación eficaz na colaboración para o financiamento do conxunto de actuacións integrantes do proxecto subvencionado, que teñen como obxectivo final a recuperación ambiental das áreas afectadas e do espazo natural.

3. Finalidade

Para os efectos sinalados, tense previsto formalizar co Concello de Xunqueira de Espadanedo o instrumento convencional ao que se refire esta memoria, por un período de vixencia que abrangue desde o día da súa sinatura ata o 15 de novembro de 2018.

4. Obxecto do convenio

O obxecto do presente convenio é fixar as liñas de colaboración entre a Vicepresidencia e Consellería de Presidencia, Administracións Públicas e Xustiza e o Concello de Xunqueira de Espadanedo para a execución do proxecto denominado Reparación dos danos provocados polas riadas de xullo de 2018.

5. Fundamentos do convenio

O Concello de Xunqueira de Espadanedo manifestou a necesidade extraordinaria e urxente de asistencia por parte da Vicepresidencia e Consellería de Presidencia, Administracións Públicas e Xustiza para acometer o proxecto denominado Reparación dos danos provocados polas riadas de xullo de 2018 que ten como obxecto reparar os danos producidos no núcleo do Barrio e no contorno da estrada do campo de fútbol municipal polas intensas choivas caídas o día 7 de xullo en Xunqueira de Espadanedo, e as enchentes que se deron a continuación.

A solicitude fundaméntase na necesidade de responder de contado ante a grave situación que se produciu en Xunqueira de Espadanedo a consecuencia das intensas choivas caídas nun reducido espazo de tempo e que deron lugar a riadas dunha magnitude devastadora. Segundo datos da estación meteorolóxica sita no Alto do Rodicio producíronse precipitacións de 75,3 l/m², provocando numerosos danos materiais.

Os maiores estragos producíronse no contorno do núcleo do Barrio e da estrada que vai desde este lugar ao campo de fútbol municipal. Os efectos destas riadas incrementáronse debido á violenta vaga de incendios que asolou o ano pasado a contorna inmediata do núcleo, afectando a toda a capa vexetal, os acuíferos e canles de escorrentía natural, polo que se produciron grandes arrastres de terras, pedras, vexetación e lodos de cinzas desde as ladeiras próximas.

Esta enxurrada provocou todo tipo de danos en bens e infraestruturas de titularidade municipal, desde derrubamento de muros, levantamento do pavimento dos camiños, asolagamento con terras, pedras e lodos de todos os camiños, canles e gabias e o taponamento da rede de saneamento con soterramento de arquetas e sumidoiros. A consecuencia destes danos, a poboación non podía nin acceder ás súas vivendas, xa que os camiños e as redes de servizos, soterrados baixo os entullos, quedaron neutralizados. A magnitude dos estragos requiriu dunha urxente intervención que devolvese a normalidade aos servizos e os veciños puidesen regresar aos seus fogares de contado.

As actuacións consistiron na recuperación das infraestruturas e servizos danados, mediante limpeza de camiños e gabias, desentullo e retirada de terras pedras e lodos, reposición dos pavimentos estragados nas vías públicas, limpeza e reposición da rede soterrada de saneamento e pluviais e limpeza de arquetas e sumidoiros.





Debido á gravidade e excepcionalidade desta situación, o concello non dispón actualmente dos recursos económicos propios suficientes para cubrir a totalidade as actuacións necesarias para a reposición das infraestruturas afectadas.

A necesidade da colaboración solicitada á Vicepresidencia e Consellería acentúase pola concorrencia doutros factores. Por unha banda, na actualidade non hai ningunha convocatoria en concorrencia á que poida acollerse este proxecto nin se prevé a súa convocatoria nas próximas datas, dado o avanzado do exercicio orzamentario, polo custo temporal da tramitación dun procedemento destas características.

Por outra banda, a falta de recursos dun pequeno concello para poder acometer as necesarias actuacións, nun marco orzamentario restritivo, de austeridade e control do gasto público e, asemade, necesariamente estable por imperativo legal para as entidades que integran a Administración local, configuran un contexto do que se derivan, entre outras consecuencias, a imposibilidade para o Concello de Xunqueira de Espadanedo de afrontar en solitario os compromisos económicos que o restablecemento do normal funcionamento dos servizos municipais, mediante a execución das actuacións obxecto de subvención, representan para a facenda local.

Así pois, este convenio de colaboración responde ao interese público e social que representa a acción de fomento da Vicepresidencia e Consellería de Presidencia, Administracións Públicas e Xustiza respecto da execución dunhas actuacións imprescindibles e necesarias para o normal funcionamento da entidade local, que lle permitan exercer as competencias e prestar os servizos que a normativa básica en materia de réxime local atribúelle aos concellos, como Administración máis próxima aos administrados.

A conxuntura descrita, a necesidade extraordinaria de asistencia manifestada polo concello e o obxectivo da actuación, así como a existencia de crédito axeitado e suficiente para a súa aplicación eficaz no restablecemento dos servizos municipais sobre os que se actuará a través do convenio que se pretende subscribir, acreditan a existencia de razóns de interese público que xustifican o recurso ao procedemento excepcional de concesión directa dunha subvención a favor do Concello de Xunqueira de Espadanedo.

6. Aplicación orzamentaria e importe

Para dar cumprimento aos obxectivos deste convenio, a Vicepresidencia e Consellería de Presidencia, Administracións Públicas e Xustiza, a través da Dirección Xeral de Administración Local, achegará a cantidade máxima de TRINTA E CINCO MIL EUROS (35.000,00 €) con cargo á aplicación orzamentaria 05.23.141A.461.0 (CP 2015 00167 *Actuacións globais destinadas á conservación, reposición e restauración do medio ambiente*) na que existe crédito adecuado e suficiente para o financiamento do conxunto de actuacións integrantes do proxecto subvencionado, que teñen como obxectivo final a recuperación ambiental das áreas afectadas e do espazo natural degradado. Este importe representa o 67,87 % do orzamento total do proxecto que constitúe o obxecto deste convenio e que ascende a 51.570,72 €.

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, con independencia de que, ao abeiro do previsto nos artigo 4 da devandita norma, lle sexan de aplicación os principios desta lei para resolver as dúbidas e lagoas que se poidan presentar.

A directora xeral de Administración Local

Marta Fernández-Tapias Núñez

Documento asinado dixitalmente á marxe

